

Dragi prijatelji/ce,

Pred vama se nalazi **aprilsko** izdanje mjesečnog informativnog biltena Omladinskog resursnog centra (ORC) Tuzla i Omladinske mreže Bosne i Hercegovine koja za sada broji **175** organizacija i **113** pojedinaca iz **74** mjesta BiH.

Bilten izlazi na bosanskom-srpskom-hrvatskom i engleskom jeziku. Sadrži kratak pregled aktivnosti ORC-a Tuzla, te informacije o mjesečnim aktivnostima omladinskih organizacija i grupa - članova Omladinske mreže Bosne i Hercegovine, njihove planove za naredni period, te sve ostale korisne i zanimljive obavijesti kao što su pozivi donatora, pozivi na konferencije i seminare, školarine, stipendije, poslove i sl.).



Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

**Uživajte u čitanju!!**

## SADRŽAJ

|  |       |           |
|--|-------|-----------|
| <b>Aktivnosti u aprilu 2015.</b>       | ..... | <b>2</b>  |
| <b>Planovi za maj 2015.</b>            | ..... | <b>6</b>  |
| <b>Aktivnosti dijela članica mreže</b> | ..... | <b>7</b>  |
| <b>Informacije / donatori / pozivi</b> | ..... | <b>23</b> |

## AKTIVNOSTI ORC/ hCa U APRILU

### ✚ Prekogranična građanska mreža za mir, pomirenje i sigurnost ljudi na Balkanu



U sklopu projektnih aktivnosti u ovom regionalnom partnerskom projektu, Omladinski resursni centar (ORC) Tuzla nastavlja sa implementacijom aktivnosti. Objavljena je nova hronika „Bosna i Hercegovina i terorizam – uticaj i porast nasilja na sigurnost u Evropi i BiH“. Pokrenuli smo novo istraživanje „Pitanje sigurnosti mladih koji žive u kolektivnim centrima, ili „alternativnim smještajima“ u BiH. Kroz aktivnosti unutar istraživanja ćemo se fokusirati na dva glavna pitanja:

Sa kojim opasnostima/problemima koji se tiču sigurnosti ljudi se susreću mladi u kolektivnim centrima ili alternativnim smještajima u BiH? i Koje su to opasnosti i poteškoće sa kojima se mladi susreću nakon odlaska iz kolektivnih centara i alternativnih smještaja.

Tokom narednih mjeseci, istraživači iz PRONI-ja Brčko će obići pet najvećih kolektivnih centara i alternativnih smještaja: Tuzla (Mihatovići), Živinice (Višća), Doboj (Dom penzionera), Bratunac (Kravice) i Brčko distrikt (Prutače). Planirano je da tokom istraživanja održimo 10 fokus grupa i 18 intervjua. Više o ovim aktivnostima možete pročitati u našim sljedećim biltenima, kao i na: [www.omladina-bih.net](http://www.omladina-bih.net)

Projekat „**Prekogranične građanske mreže za mir, pomirenje i sigurnost ljudi na Balkanu**“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Priština Kosovo, Omladinski resursni centar Tuzla. Projekat je podržan od Evropske Unije.

### ✚ Trening „Javno zagovaranje“ Jahorina

U okviru TACSO BiH podrške inicijativama mreža, TACSO BiH u saradnji sa ORC Tuzla organizovao je dvodnevni trening za omladinske organizacije - članice Omladinske mreže BiH. Trening se održao na Jahorini, u hotelu Termag, od 29. do 30. aprila 2015. godine.

Trening je pokrio oblasti: „Kampanje javnog zagovaranja“ (Kako napraviti kampanju u lokalnoj zajednici? Ko treba biti uključen u kampanju? Ko su stakeholderi? Ko bi trebao biti uključen u partnerstvo? Kakvu vrstu kampanje trebamo napraviti? Metode implementacije? Kako organizovati kampanju bez velikih sredstava? Kako privući pažnju medija?).

Fokus treninga je stavljen na konkretan i produktivan rad izrade samog plana strateškog zagovaranja. Trener tokom svih radionica bila je Nina Branković, konsultantica i stručnjak u ovom polju sa višegodišnjim iskustvom.

U okviru spomenute podrške TACSO BiH je pružio i mentorsku podršku izradi konkretnih advocacy akcija učesnicima treninga. Na ovom treningu je učestvovalo 15 mladih ljudi iz BiH koji dolaze iz manjih mjesta.



## ✚ Omladinski susreti / konferencija - There is always a choice - Civic courage in times of war and peace, TUZLA (BiH), 26. – 29. avgust 2015.

Počele su pripreme za organizovanje omladinskih susreta u Tuzli. Organizatori i partneri događaja su: **Forum Civilna Mirovna Služba (forumZFD), Post conflict research Centar (PCRC); IPAK Tuzla, ORC Tuzla, Humanity in Action, EUROCLIO, YIHR, FAMA Methodology, Mreža Mira, Anne Frank House, Pax Christi Aachen.**

Konferencija će trajati 4 dana, a očekuje se učešće 200 mladih iz BiH i regiona. Pored organizovane grupe od strane partnera, ovi susreti će biti otvoreni za mlade iz grada Tuzle i ostalih područja. Tokom susreta planirani su mnogi događaji: radionice, izložbe, prezentacije časopisa, projekcije dokumentarnih filmova, debate, forum teatar, teatarske predstave, color street, skejt performans, interkulturalno veče. Događaji će se održavati na otvorenim i zatvorenim prostorima u Tuzli. U okviru pripremnih aktivnosti, tokom aprila održani su sastanci partnera u Tuzli i u Sarajevu. Više informacija, kao i poziv i prijavni formular u našim narednim biltenima i na našoj stranici.

## ✚ Posjeta predstavnika Akademije za međunarodni razvoj – AID MENA



Akademija za međunarodni razvoj Bliski Istok i Sjeverna Afrika (AID-MENA), je organizacija koja radi u poljima socio-ekonomskog, socio-političkog razvoja i demokratizacije u MENA regiji. Osnovana je u Kairu, Egipat 2006. godine, te registrovana u kraljevini Jordan kao regionalna neprofitna organizacija. <http://www.aid-mena.org>

AID-MENA je otvorila svoj ured i u Sarajevu, te su njeni predstavnici: Ahmed Alhamid - predsjednik, Magdy Fahmy - Finansijski menadžer i May

Hassan - Business Development oficir, posjetili naš centar 10. aprila.

Svrha sastanka je bila razvoj saradnje i mogućih zajedničkih interkulturalnih aktivnosti između naših organizacija.

## ✚ OMLADINSKA GRUPA ORC TUZLA

### ► Mirovna akademija za mlade žene liderke

Organizacija Kvinna till Kvinna implementirala je projekat „Mirovna akademija za mlade žene liderke“ od 19. do 24. aprila, uz finansijsku pomoć švedske Poštanske lutrije.

Cilj ovoga projekta je da na jedinstven način organizuje program obuke za mlade žene na Balkanu i Kavkazu, koji će mlade dame osposobiti za preuzimanje aktivne uloge u svojim zajednicama. Jedna od radionica ovoga modula se održala na Jahorini u hotelu Lavina. Realizacija drugog obaveznog modula obuke će biti u Mostaru početkom jula. Nakon toga planirano je neobavezno učešće u programu mentorstva, gdje će učesnice moći iskoristiti u komponentu grupnog mentorstva kao vid podrške pri implementaciji malih projekata i pri izradi zagovaračkih inicijativa u svojim zajednicama, na državnom i/ili međunarodnom nivou.

Na ovom modulu učestvovala je i članica Omladinske grupe Omladinskog resursnog centra Tuzla **Lejla Zonić.**



### ► FEM KAMP „Rodno uvjetovano nasilje kroz prizmu braniteljica ženskih prava“

U okviru projekta „Rodno uvjetovano nasilje: Pogled iz drugog ugla – Nasilje u vezama mladih“, u periodu od 10. do 12. aprila, Fondacija CURE je na Bjelašnici organizovala FEM kamp za mlade žene i djevojke pod nazivom „Rodno uvjetovano nasilje kroz prizmu braniteljica ženskih prava“. Na kampu su prisustvovala aktivistkinje različitih organizacija iz raznih dijelova Bosne i Hercegovine, a Omladinsku grupu Omladinskog resursnog centra Tuzla je predstavila članica **Dijana Osmanović**.

Glavni cilj edukativnog kampa bio je osnaživanje mladih žena i djevojaka o ženskim ljudskim pravima kroz rad na pitanju sopstvene edukacije. Edukacija se odvijala u trajanju od tri dana, a metod rada uključivao je kratke prezentacije, rad u grupama, mala istraživanja, video projekcije i druge aktivnosti. Program je dizajniran za lični rast polaznica koji osigurava individualno učenje, rad u timu, te siguran prostor u kojem svaka prima podršku, potiče kreativnost i originalnost svake učesnice.



### ► Fokus grupa u projektu „Antidiskriminacijski program“



Forum građana Tuzle je 15. aprila organizovao sastanak fokus grupe, koji se održao u TC Dramar u 10:00 h. Sastanak se realizovao u okviru projektnih aktivnosti „Antidiskriminacijski program – praćenje diskriminacije u 2014. godini“. Učesnici fokus grupe bile su organizacije sa kojima je Forum građana Tuzle saradivao tokom realizacije projekta.

Cilj fokus grupe bio je upoznavanje sa dosadašnjim aktivnostima, ostvarenim saradnjama, ciljevima projekta i nastavak saradnje sa učesnicima. Ovom sastanku su prisustvovali članovi Omladinske grupe ORC-a Tuzla, **Zamire Sokoli i Muharem Gaši**.

### ► Forum prijateljstva, Bosanski Petrovac

Forum „Most prijateljstva“ je aktivnost mladih čija je svrha međusobno upoznavanje mladih različitih nacionalnosti radi prevazilaženja stereotipa i izgradnje povjerenja, kao osnove za izgradnju mira.

Međunarodna organizacija Foruma „Most prijateljstva“ Čelarevo, organizirala je dvodnevne susrete mladih iz država bivše Jugoslavije pod nazivom „Upoznajmo se da bi nam život bio ljepši“, koji su se održali 18. i 19. aprila u Bosanskom Petrovcu, a susretima se odazvalo 50 mladih iz Bosne i Hercegovine, Srbije i Makedonije.



Tokom ove posjete učesnici su imali priliku da posjete muzeje Skendera Kulenovića i Jovana Bijelića, Gradsku džamiju u Bosanskom Petrovcu i pravoslavnu crkvu.

Načelnik Općine Bosanski Petrovac Zlatko Hujić, primio je sve učesnike Susreta mladih Foruma „Most prijateljstva“ i uz srdačne riječi zahvalio se, te pozvao da ponovno posjete Bosanski Petrovac,

grad koji se ponosi svojim velikanima. Za sjećanje na Bosanski Petrovac u ime općine, načelnik Hujčić je mladima iz regiona uručio prigodne darove, među kojima je i jedan mali petrovački ćilim, sa posebnim autentičnim dezenom, jedinstvenim u cijelom svijetu.

Učesnici u ovoj aktivnosti bili su i članovi Omladinske grupe Omladinskog resursnog centra Tuzla: **Dijana Osmanović, Eldar Imamović, Lela Mujkić, Muharem Gaši, Mehmed Sulejmanagić i Merita Sokoli.**

### ► Regionalna konferencija Mlada Evropa

17. aprila u Domu mladih Tuzla organizovana je završna regionalna konferencija „Mlada Evropa“. Regionalna konferencija u Tuzli okupila je omladinska udruženja i nevladine organizacije koje se bave pitanjima mladih, vijeća mladih/omladinske savjete, općinske službenike/ce za mlade, te omladinske lidere/ice s ciljem promocije zaključaka međunarodne konferencije mladih, ali i diskusije o položaju mladih u BiH.



Kroz tri paralelne radionice promoviran je značaj aktivnog građanstva mladih i njihovog uključivanja u demokratske procese, zatim koristi od međunarodne saradnje i umrežavanja mladih, te značaja prevazilaženja nacionalizma za održiv mir i bolju budućnost za sve. Učesnici konferencije ispred Omladinske grupe Omladinskog resursnog centra Tuzla bili su **Slobodan Blagovčanin i Merita Sokoli.**

### ► Prva konferencija platforme dijaloga „Dijalog – put ka budućnosti“

U Sarajevu je 22. aprila održana prva konferencija platforme dijaloga „Dijalog – put ka budućnosti“ u Parlamentarnoj skupštini BiH. Konferencija je održana u sklopu projekta UNDP-a pod nazivom „Dijalog za budućnost“, podržanog od strane Predsjedništva BiH. Jedan od učesnika konferencije bio je i član Omladinske grupe ORC-a **Haris Selmanović**, koji je bio pozvan kao jedan od najaktivnijih učesnika lokalnih Omladinskih foruma. Konferencija je otvorena potpisivanjem „Deklaracije platforme dijaloga“ od strane predsjedavajućeg Predsjedništva BiH, Mladena Ivanića. Ovom Deklaracijom, Predsjedništvo BiH, se obavezalo da će podržavati projekte koji vode ka pomirenju i uspostavljanju pozitivnog dijaloga u BiH. Pored potpisivanja Deklaracije, u sklopu Konferencije su u prostorijama Parlamentarne skupštine BiH održane i tri diskusije (mladi, kultura i obrazovanje), na kojima su učesnici imali priliku da iznesu svoje ideje kojima se ova tri bitna sektora razvoja jedne države mogu poboljšati.



## ► Radionice u sklopu projekata „Date the state“

Tokom mjeseca aprila Omladinska grupa ORC-a Tuzla održala je radionice obuke o Ustavu, te političkom aparatu Bosne i Hercegovine.

Kroz samu obuku prošlo je trideset učesnika sa područja Tuzlanskog kantona. Tokom dva radna vikenda: 11.-12. i 18.-19. april, učesnici su bili podijeljeni u dvije grupe, gdje su imali priliku da se upoznaju sa osnovama Ustava Bosne i Hercegovine, razlozima njegovog donošenja, te događajima koji su mu prethodili.

Pored ove teme, učesnici su se upoznali i sa izuzetno komplikovanom političkom strukturom naše države, te načinom donošenja odluka unutar iste.



Projekat „Date the state“ je finansiran od strane Fondacije tuzlanske zajednice, a provodi ga Omladinska grupa ORC Tuzla. Partner na projektu je Kuća plamena mira, a medijski partneri radio „Kameleon“ i RTV7 Tuzla.

## ✚ REDOVNE AKTIVNOSTI:

Tokom aprila smo u sklopu naših redovnih aktivnosti radili na održavanju i razvoju komunikacija i koordinacije unutar Omladinske mreže Bosne i Hercegovine - [www.omladina-bih.net](http://www.omladina-bih.net). U okviru toga smo svakodnevno na mejling listu mreže [posta@omladina-bih.net](mailto:posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti), održavali i redovno dopunjavali informacije na našoj web stranici [www.omladina-bih.net](http://www.omladina-bih.net), slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima), vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

## PLANOVI HCA/ORC-a ZA MAJ

- Sprovođenje redovnih aktivnosti kroz Omladinsku mrežu BiH;
- Nastavak aktivnosti u okviru Prekogračnične građanske mreže za mir, pomirenje i sigurnost ljudi na Balkanu (nastavak rada na istraživanju – organizovanje sastanka sa stejkholderima);
- Pripreme za nastavak aktivnosti u okviru koraka 7 (STEP 7) ALF mreža BiH;
- Realizacija projekta „Date the state“ Omladinske grupe Omladinskog resursnog centra u Tuzli (posjeta Parlamentu BiH).

***Više informacija na našoj web stranici: [www.omladina-bih.net](http://www.omladina-bih.net)***

## AKTIVNOSTI ČLANICA OMLADINSKE MREŽE BIH



NGO "EKO-LEONARDO YOUTH CLUB"

Priboj bb, Lopare, Priboj 75 249

Mob: +387 (0)65 474 893, 065 538 494

E-mail: mikicarock@yahoo.com; ekoleonardo@hotmail.com

Web: [www.eko-leonardo.info](http://www.eko-leonardo.info)

### DAN ZEMLJE – EARTH DAY - PRIBOJ 2015

Partnerska mreža NVO BiH, u sastavu NVO EKO - Leonardo iz Priboja, Zelene staze - Tuzla i TOPEER iz Doboja, potvrđena je na projektu „Različitost na dohvat ruke - promocija interkulturalnog dijaloga, tolerancije i razumijevanja u BiH“. U Priboju, na sjevernim obroncima planine Majevice, u nedjelju 19. aprila održani su treći tradicionalni međuetnički ekološko-biciklistički susreti „Dan Zemlje – Earth Day“ Priboj 2015.

Oko sedamdeset mladih volontera/aktivista iz Priboja, Lopara, Teočaka, Sapne, Zvornika, Bijeljine, Tuzle, Lukavca, Doboja, Brčkog i drugih mjesta sjeveroistočne BiH nastavljaju sa aktivnostima koje je inicirala mreža nevladinih organizacija okupljena tokom realizacije više projekata međuetničke saradnje finansiranih od strane Ambasade SAD u Sarajevu.

U centru Priboja prije tri godine zasađen je simboličan „Park tolerancije“, u kome se zbog vremenskih neprilika tokom ljeta 2013. godine većina sadnica nije primila. Uporni ljubitelji prirode u saradnji sa predstavnicima Ambasade SAD u Sarajevu su tokom drugog okupljanja prošle godine ponovo zasadili sadnice i obnovili park. Radosna vijest je da je Park tolerancije ove godine zazelenio u Priboju. Tokom ekološkog dijela ceremonije mladi su okopali zasađene sadnice, počistili prostor parka i zasadili cvijeće.

Zatim je uslijedila vožnja biciklista oko jezera Sniježnica, tokom koje se simbolično u dva navrata prelazila entitetska linija na trasi od 21 kilometar. Time je otvorena na Majevisi ovogodišnja brdsko-biciklistička sezona vožnjom od doma u centru Priboja, ka jezeru Sniježnici, preko Rastošnice, Obršina i Dežmata, zatvarajući krug na zadnjoj „stanici“ Priboj.

Mladi aktivisti/volonteri su u prirodnom ambijentu potvrdili da zajedničkim druženjem i boravkom u prirodi mogu graditi mostove međusobnog uvažavanja i tolerancije i simbolično obilježili 20 godina mira u BiH.



Vožnja je bila rekreativnog karaktera. Učesnici manifestacije su se družili, uživali u prirodi i ujedno bili promoteri turističkih potencijala Majevice!

Događaj je medijski ispraćen, BN televizija, HIT televizija Brčko, Federalna televizija, Radio Glas Drine kao i mnogi portali. Učesnike je takođe tradicionalno ispratio načelnik općine Lopare, dr Rado Savić. Nakon biciklijade održan je sastanak upravnog odbora partnera na projektu.



## VIJEĆE MLADIH OPĆINE TOMISLAVGRAD

Letka b.b., 80 240 Tomislavgrad

Tel.: 034 356 440, fax: 034 356 444

E-mail: [vijecemladih.tg@gmail.com](mailto:vijecemladih.tg@gmail.com)

### **✚ Predstavници Vijeća mladih općine Tomislavgrad nazočili utemeljenju Vijeća mladih općine Grude**

Dana, 09. travnja 2015. godine u Općinskoj vijećnici općine Grude održana je Utemeljiteljska skupština Vijeća mladih općine Grude. Na ovoj Utemeljiteljskoj skupštini nazočili su kao gosti i predstavnici Vijeća mladih općine Tomislavgrad.

Udruge utemeljiteljice su Ekološka udruga „Kadulja“, Društvo „Grudske mažoretkinje“, te Hrvatsko kulturno-umjetničko društvo „Sveta Kata“.



Utemeljiteljskoj skupštini nazočili su ministrica obrazovanja, znanosti, kulture i športa Županije Zapadnohercegovačke Ružica Mikulić, načelnik Općine Grude Ljubo Grizelj, osoba zadužena za rad s mladima pri Općini Grude Srećko Mikulić, kao i predsjednici triju udruga utemeljiteljica: Marina Zadro, Mladen Leko i Svetimir Marić.

Također, svojom nazočnošću podršku su pružili i predstavnici Vijeća mladih općine Tomislavgrad, Vijeća mladih općine Posušje, Vijeća mladih općine Široki Brijeg, te predstavnici udruga mladih iz Ljubuškog.

Formiranjem Vijeća mladih općine Grude stekli su se uvjeti za formiranje Vijeća mladih Zapadnohercegovačke županije, a nakon što završi proces njenog formiranja uslijedit će i formiranje Vijeća mladih Federacije BiH.

**Više na našoj web stranici: [www.vijecemladih-tg.com](http://www.vijecemladih-tg.com)**



**H.O. Muslimansko dobrotvorno društvo - MERHAMET DOBOJ**  
**Kralja Aleksandra 17, 74 000 Doboj**  
**Tel./fax: 053 226 886**  
**E-mail: merhamet.doboj@cutuk.net**  
**Web: www.ngo.ba; www.facebook.com/Merhamet-Doboj**

#### ✚ **AKTIVNOSTI H.O. „MERHAMETA“ DOBOJ ZA APRIL**

- Volonterke „Merhameta“ Doboj, Amra Mišić i Suzana Ristić prisustvovala ispred Koalicije „Tolerantno i pozitivno iz Doboja“ planiranju zajedničke kampanje u BiH vezanoj za toleranciju i aktivnosti svih Koalicija za borbu protiv mržnje i predrasuda. Konferencija je održana u Konjicu u Hotelu „Garden“ od 14.-16. aprila 2015. godine.
- Volonterka „Merhameta“ Doboj, Amra Mišić prisustvovala sastanku članica „ACCOUNT“ mreže koji je održan u Hotelu Garden City u Konjicu 16.04.2015. godine.



- Volonterke „Merhameta“ Doboj, Melisa Mujanović, Lejla Mujanović i Anela Jašarević učestvovala u radionici „Stop nasilju nad djecom i mladima“ u organizaciji NVO „Šesto čulo“ Doboj koja je održana u Američkom kutku Doboj 18. 04. 2015. godine.
- Volonterke „Merhameta“ Doboj Amra Mišić i Suzana Ristić prisustvovala otvaranju novih prostorija „Udruženja distrofičara“ Regije Doboj - 24.04.2015. godine.



- Predsjednica „Merhameta“ Doboj, Avdić Faketa prisustvovala sastanku povodom rada „Narodne kuhinje“ u Doboju koji je održan u zgradi Gradske uprave - 27.04. 2015. godine.
- Podjela humanitarne pomoći za članove „Merhameta“ Doboj - 30.04. 2015. godine.



Svakodnevne aktivnosti „Merhamet-a“ Doboju tokom mjeseca aprila obuhvatale su:

- Praćenje javnih poziva za projekte,
- Rad ambulante.

\*\*\*\*\*



**Udruženje Centar za edukaciju, informisanje i afirmaciju mladih "INPUT"**  
 Prvomajska b.b., 72 000 Zenica  
 Tel./fax: 061 766 532  
 E-mail: [input.ze@gmail.com](mailto:input.ze@gmail.com)  
 Web: [www.inputcentar.com](http://www.inputcentar.com); [www.input.tech.ba](http://www.input.tech.ba)  
 FB: <https://www.facebook.com/udruzenje.input>

#### ✚ Međunarodni dan djevojaka u informaciono-komunikacionim tehnologijama (ICT)

U okviru Međunarodnog dana djevojaka u informaciono-komunikacionim tehnologijama (ICT) i BiH je uzela učešće. Centar za mlade INPUT je od 21.do 24.04.2015. obilježio sedmicu djevojaka u ICT.

Prvi dan je održan razgovor sa predstavnicom Microsofta BiH. Anidom Jusufović gdje je predstavljeno djevojkama na koji način i kako da se afirmišu i uključe u aktivnosti ICT. Drugi dan je održana edukativno - kreativna radionica na temu osnove računara, gdje su djevojke imale priliku da sam rastave i sastave računar. Treći dan je održana edukativna radionica: Osnove photosopa, gdje su učesnice mogle da uz prisustvo mentora u par koraka obrade svoju fotografiju. Četvrti dan je održan razgovor sa magistricom elektrotehnike Selmom Durmić, gdje je djevojkama predstavila na koji način i kako je upisala elektrotehniku, zbog čega voli taj poziv i koja je pozitivna strana da se djevojke bave ICT.

Sve pomenute radionice su bila veoma posjećene od strane djevojaka (osnovnoškolskog, srednjoškolskog uzrasta, studentica i svršenica raznih fakulteta).





**OMLADINSKA ORGANIZACIJA "SVITAC"**  
 Jusufa Čampare bb, 76 100 Brčko Distrikt  
 Tel./Fax: 049 211 032  
 Email: [svitac@teol.net](mailto:svitac@teol.net)  
 Web: [www.svitac.org](http://www.svitac.org)  
 FB: [www.facebook.com/omladinska.svitac](http://www.facebook.com/omladinska.svitac)

## **✚ KREATIVNE RADIONICE**

Neformalno obrazovanje i učenje kroz igru, kao i socijalizacija je važan dio kreativnih radionica. Omladinska organizacija Svitac je u aprilu nastavila sa svakodnevnim aktivnostima.

Učesnici su podijeljeni u dvije grupe, uzrast 4 - 7 godina svakim danom od 11:00-13:00, a uzrast 8+ od 13:00-15:30 časova. Ovaj mjesec mala grupa je radila razne teme iz bojanki, a koje uključuju učenje i razlikovanje boja, oblika i ponavljanje brojeva od 1-10, boje na semaforu, razne kolaže, prepoznavanje boja, čitanje priča, slušanje a nakon toga mala diskusija odgovarajuća za uzrast.



Poslepodnevna grupa je radila proljetne teme na kolaž papiru, crtanje porodičnog stabla kroz vježbanje engleskog jezika i ponavljanje osnova gramatike. Radionice se održavaju u Omladinskom centru Brčko distrikta.

Koordinator radionica je Sanja Radovanović uz asistenciju EVS i Weltwaerts međunarodnih volontera Tamare Wonner i Nicolasa Zduna iz Njemačke, te Stephanie Burland, Isambarda Raynera i Johna Streatfileda iz Velike Britanije. Trenutno ima 45 učesnika.

## **✚ MUZIČKE RADIONICE**

### **► Radionice gitare**

Učesnici radionice gitare radili su na etidama i duetima izabranim za njih u skladu sa njihovim mogućnostima i poznavanjem instrumenta.

### **► Radionice sambe**

Uz uobičajene ritmičke igre učesnici radionice uvježbavali su nove kompozicije uz usavršavanje i uživanje u već savladanim.

### **► Hip-Hop radionice**

Učesnici hip-hop radionice isprobavali su svoje vještine pisanja tekstova i repanja na zadatu temu.



Ovaj mjesec tema je bila matematika ili neka srodna nauka po izboru učesnika.

## JEZIČKE RADIONICE

Kursevi engleskog i njemačkog jezika su nastavljani u aprilu. 30 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskom centru Brčko distrikta. Starost studenata je od 8 do 35 godina.

### ► Radionica engleskog jezika „I love English”

Učesnici su i u aprilu nastavili sa diskusijama i pro/kontra argumentacijama na 4 do 6 tema koje bi zadao koordinator, te bi na taj način vježbali izgovor i neformalnu konverzaciju. Koordinator radionica je EVS međunarodni volonter iz Velike Britanije John Streatfield. Radionice se održavaju ponedjeljkom i srijedom u terminu od 19:00-20:00 u Omladinskom centru Brčko distrikta. Trenutno ima 20 učesnika, uzrasta 15+.

### ► ŠTA IMA ?! (SPRECHEN-THEMEN- ARGUMENTIEREN)

#### Radionice njemačkog jezika

Interaktivne radionice njemačkog jezika su i dalje rado posjećene i veoma dobro isplanirane, i za one koji zaista žele nešto da nauče od velike su koristi. Trenutno ima 20 polaznika, uzrasta 18+. Radionice se održavaju u Omladinskom centru, ponedjeljkom i srijedom od 20:00-21:00 časova. Koordinator radionica su međunarodni volonteri iz Njemačke Nicolas Zdun i Tamara Wonner.

## SPORTSKE RADIONICE

Svakodnevne sportske radionice su u aprilu donijele mnogo zabave i radosti za manje učesnike. Broj učesnika varira i do 40, uzrasta 6+. Učesnici, posebno dječaci ali i djevojčice su oduševljeni sportskim radionicama, tako da se uvijek nađe dodatna zabava uz takmičarsku igru ili uživanje u timskim igrama. Koordinator sportskih radionica je Nicolas Zdun, međunarodni volonter iz Njemačke.



***Za maj se planira nastavak svih redovnih radionica Omladinske organizacije Svitac i održavanje FutureShorts festivala.***



## INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778 779

Web: [www.mladi.org](http://www.mladi.org)

### ✚ Institut za razvoj mladih KULT i SOS Dječija sela u BiH pomažu mladima da postanu Spretni za život!

SOS Dječija sela BiH i Institut za razvoj mladih KULT potpisali su sporazum o saradnji. Sporazumom će se osigurati da se programi rada s mladima koje je razvijao Institut, a koji se provode u Obrazovno-raznodnom centru za mlade SPAJALICA u Ilidži, uvedu i u SOS Dječija sela BiH.

„Spretni za život! naziv je inicijative u okviru koje će šest mladih koji su odrastali u SOS Dječijim selima imati priliku da prođu niz radionica kako bi radili na svom osnaživanju, ali i kako bi dobili konkretne alate s kojima će postati konkurentniji na tržištu rada. Pomoć djeci bez roditeljskog staranja bit će pružena kroz Program razvoja potencijala kod mladih za društveni angažman, izgradnju vlastitog biznisa i zapošljavanje, u okviru kojeg će obuku proći i mladi iz devet drugih omladinskih centara iz BiH. Ovo će biti odlična prilika da ostvare međusobnu saradnju i zajedno rade na svojoj boljoj budućnosti“ - izjavio je Jasmin Bešić, izvršni direktor Instituta za razvoj mladih KULT.



U Bosni i Hercegovini djeluju dva SOS Dječija sela – u Sarajevu i Gračanici i kroz njih su u protekle dvije decenije, koliko SOS Dječija sela djeluju u našoj zemlji, više od 2500 djece i mladih dobilo je podršku u rastu i razvoju.

### ✚ Počinje istraživanje o budžetskim poticajima

Počele su aktivnosti u vezi s istraživanjem o poticajima za privredu u BiH. Sastanku Upravnog odbora Mreže za kreiranje boljeg poslovnog ambijenta u BiH prisustvovali su Aida Zejčirović (Bolji posao d.o.o.), Almedina Selimović (Udruženje nezaposlenih Otium), Dragana Šobot (Opština Istočna Ilidža), Asim Ibrahimagić (Agencija za rad i zapošljavanje BiH), te predstavnici/e inicijative Poslovni prostor BH Lejla Brutus i Rusmir Pobrić.

Tokom sastanka utvrđen je prijedlog Akcionog plana Mreže za 2015. g. te su započete aktivnosti u vezi s istraživanjem o poticajima za privredu u BiH. Iz Upravnog odbora je istaknuto da je situacija u vezi sa stanjem privrede i zapošljavanjem u BiH poražavajuća te da je neophodno napraviti korake koji će voditi njihovom poboljšanju.

## **+ Održana regionalna konferencija Mlada Evropa u Tuzli**

Kroz tri paralelne radionice promoviran je značaj aktivnog građanstva mladih i njihovog uključivanja u demokratske procese, zatim koristi od međunarodne saradnje i umrežavanja mladih, te značaja prevazilaženja nacionalizma za održiv mir i bolju budućnost za sve.

Učesnici/e konferencije kroz radionicu SWOT analize, po prvi put su razgovarali o mladima u ruralnim područjima koji poznaju rad na poljoprivrednim dobrima i to je navedena kao njihova snaga. Kao slabost mladih prepoznata je nedovoljna informiranost, te nedostatak radnog iskustva stečenog volontiranjem tokom formalnog obrazovanja.

Kao prilika mladih prepoznate su različite mogućnosti koje se otvaraju mladima kada je riječ o međunarodnom umrežavanju, studiranju vani, te prilike za zapošljavanjem u IT sektoru ili u poljoprivredi.

## **+ Počela gradnja gljivarnika za porodicu Bilić iz Maglaja**

Počela je gradnja gljivarnika, koji će Sabiri Bilić i njenoj porodici biti jedini izvor prihoda. Tokom majskih poplava porodici Bilić dom je potpuno uništen. Ostali su tada bez jedinog izvora prihoda - šupe u kojoj je Sabira uzgajala gljive. Uništene su i industrijske mašine za tapaciranje, koje je njen suprug Safet dobio kao otpremninu nakon što je lokalna fabrika u kojoj je radio prestala sa radom.

Ova pomoć Instituta za razvoj mladih KULT porodici Bilić mnogo znači, kaže Sabira Bilić. "Znači mi to mnogo. Pronašla sam se u tome." Sabira, njen suprug i dvoje maloljetne djece žive, kaže, doslovno od danas do sutra. Djeca se školuju, a ona i suprug su na birou. Oboje nezaposleni. „Ne radimo ni muž, ni ja. Oboje smo na birou. Živimo od dječijeg doplatka od 20 maraka, a i to kasni. Djeca idu u školu. Jedno u četvrti, a drugo u deveti razred osnovne škole“ – dodaje Sabira.

Prije poplava porodica Bilić živjela je u općinskoj baraci. Nakon poplava, dobri ljudi ovoj porodici su pomogli izgraditi kuću. U gradnji je učestvovao i Institut za razvoj mladih KULT uz podršku donatora. „Sve će biti lakše kada počnemo uzgajati gljive“ – tvrdi Sabira Bilić. Radovi na izgradnji novog objekta za uzgoj gljiva napreduju i očekuje se da će uskoro biti i gotovi. „Po završetku, kao dio iste inicijative, porodici Bilić ćemo donirati i 70 briketa sa gljivama te tako podržati porodični mali biznis i pružiti im šansu za dostojan život“ – dodala je projektna koordinatorica u Institutu Mirela Ajanović.

## **+ Počelo uspostavljanje UMID online centara u BiH**

Otvoreni su prvi online UMID centri i to u Omladinskom Klubu „Pod istim suncem“ u Jablanici i Udruženju mladih Nautilus u Sarajevu. U sklopu inicijative UMID online potpisani su ugovori o dodjeli grantova između Instituta za razvoj mladih KULT i ovih omladinskih klubova.

Osim ovog grada, online centar biće postavljen u još dva – Srebrenici i Velikoj Kladaši. Institut za razvoj mladih KULT javnim pozivom pozvao je omladinske organizacije iz cijele BiH da apliciraju i tako postanu jedan od četiri regionalna online UMID centra u BiH.



UMiD (Uči, misli i djeluj) je obuka koju Institut provodi više od 10 godina u in class verziji i koju je prošlo oko 300 mladih ljudi.

Kako bismo adekvatno odgovorili sve većem interesu mladih ljudi da pohađaju UMiD obuku i po uspješnom završetku iste postanu omladinski lideri, odlučili smo da UMiD obuku učinimo dostupnom i na internetu.



Na taj način svim mladim ljudima možemo da pružimo priliku da je pohađaju. Potrebno je da imaju internet i računar i obuku mogu pohađati i od kuće. Za one koji to nemaju, moći će u online UMiD centrima.

Polaznici obuke koji se pokažu kao najangažiraniji i uspješni, imati će priliku još u toku obuke aplicirati za male grantove lokalne građanske inicijative i tako adresirati probleme u svojim lokalnim zajednicama. Sve primjenjujući znanje i vještine stečene UMiD online obukom.

### ✚ Na korak do Federalnog vijeća mladih, Posavina dobila krovno tijelo mladih

12. aprila 2014. godine održana je Osnivačka skupština Vijeća mladih Županije Posavske. Čine ga tri općinska vijeća mladih: Vijeće mladih Općine Domaljevac-Šamac, Vijeće mladih Općine Odžak i Vijeće mladih Općine Orašje.

Na osnivačkoj skupštini usvojen je Statut i odabrani su organi upravljanja. Za predsjednicu Skupštine izabrana je Matija Matić, ispred Vijeća mladih Općine Domaljevac-Šamac. Za predsjednicu Nadzornog odbora izabrana je Dijana Brašnjic, ispred Vijeća mladih Općine Odžak. Za predsjednika Upravnog odbora, ujedno i predsjednika Vijeća mladih izabaran je Dino Imširović, ispred Vijeća mladih Općine Orašje.

Članice vijeća su dogovorile i plan i program djelovanja Vijeća u 2014. godini koji počiva na međusobnoj saradnji, jačanju općinskih vijeća i ostvarivanju minimuma mjera iz Zakona o mladima FBiH na kantonalnom nivou.

### ✚ Održana još jedna manifestacija “Dan otvorenih vrata Spajalice”

Gosti Obrazovno-raznodnog centra za mlade Spajalica bili su učenici 7., 8. i 9. razreda osnovnih škola sa područja Ilidže. Osim druženja i dobre zabave učenici su učestvovali i u edukativnim radionicama.

Obzirom da se bliži kraj školske godine tj. da dolazi eksterna matura učenike smo upoznali sa programom instruktivne nastave za eksternu maturu koji će se odvijati u Spajalici tokom mjeseca maja.

Osnovcima smo govorili o volonterskom radu i neformalnom obrazovanju.



Program koji je trajao dva sata, bio je edukativan i svi osnovci i naši gosti dobro su se zabavili.



[www.pronibrcko.ba](http://www.pronibrcko.ba)

**PRONI Centar za omladinski razvoj**  
**Mehmedagića 24, 76 100 Brčko distrikt BiH**  
**Tel./Fax: 00 387 49 217 695**  
**E-mail: [pronibrcko@teol.net](mailto:pronibrcko@teol.net)**  
**[www.pronibrcko.ba](http://www.pronibrcko.ba)**

#### **✚ Gradonačelnik primio novinara iz Turske**

21.4. 2015. prilikom današnjeg boravka u Brčkom, Tayfun Yilmaz, novinar iz Turske, zaposlen pri *Habertürk* novine u sklopu medijskog konglomerata – Ciner Media Holding posjetio je gradonačelnika Brčko distrikta BiH dr. Antu Domića i intervjuisao ga u vezi sa specifičnim statusom i društveno-političkom situacijom u Brčko distriktu BiH.

Prevladavala su pitanja o Brčko distriktu BiH u kontekstu multietničke zajednice i suživotu različitih naroda, potom kako je osnovan te načini funkcionisanja lokalne administracije.

Dr. Domić je gospodinu Yilmazu pojasnio poziciju Brčko distrikta BiH u odnosu na entitete i na BiH, te u čemu se ogleda značaj da Brčko distrikt BiH sačuva svoj specifični status u ispunjavanju svih obaveza koje je Konačna arbitražna odluka propisala. Također, osvrnuo se na događaje iz prošlosti, ali i vrijeme nakon prisutnosti OHR-a u Brčkom.

U sklopu posjete Distriktu Yilmaz će također prisustvovati međunarodnom seminaru na temu socijalne inkluzije "*Mind the Gap! Raising Awareness on Social Inclusion of Young People*" u zajedničkoj organizaciji Youth Express Network (Y-E-N) i bosanskohercegovačkog člana mreže Proni Centar za omladinski razvoj, koji se u Brčkom održava od 19. do 25. aprila uz učešće grupe mladih iz cijele Evrope.

Yilmaz je na kraju zahvalio gradonačelniku na izdvojenom vremenu i prijemu te mu je u znak zahvalnosti uručio prigodan poklon iz svoje zemlje.



#### **✚ Na seminaru u Brčkom učestvuje 30 omladinaца из 14 земаља**

У оквиру „Прони“ центра за омладински развој у Брчком је, прије три дана, започео семинар „Мајнд д гап“ о социјалним правима младих у Европи на којем учествује преко 30 оmlадинаца из 14 различитих земаља.

Ovaj seminar, koji se završava u petak, organizovan je u okviru kampanje „И социјална права су људска права“ коју су, као чланица мреже „Јут Експрес Нетворк“, са другим чланицама, започели активисти „Прони“ центра.

Циљ је да идеје које буду изнесене на семинару у Брчком постану дио кампање коју ће мрежа „Јут Експрес Нетворк“, радити заједно са Савјетом Европе.



#### **PRONI dio konferencije za omladinski rad**

U periodu od 30. marta do 1. aprila 2015. godine u Andrićgradu održana je Treća konferencija omladinskog rada u Republici Srpskoj – KORA3. Konferencija je okupila oko 40 učesnika/ca iz Bosne i Hercegovine, Republike Srbije i Crne Gore.

Treća konferencija omladinskog rada rezultirala je velikim brojem zaključaka koji se tiču omladinskog rada, rada omladinskih centara te regionalne saradnje mladih u ovim oblastima.

Jedan dio zaključaka će se naći i u nacrtu dokumenta Omladinska politika Republike Srpske za period od 2016. do 2020. godine.



Kao članica Mreže omladinski centara za animiranje, razvoj i trening - M.O.C.A.R.T PRONI Centar je i ove godine bio učesnik konferencije kako bi dao konkretne preporuke za rad s mladima sa posebnim fokusom na sjeveroistočnu BiH.

Ove godine smo za učesnika konferencije preporučili i novonastali Omladinski centar Šamac koji poslije majskih poplava vrijedno i svakodnevno radi na poboljšanju položaja mladih u ovoj opštini.

Konferenciju je organizirala mreža M.O.C.A.R.T, Perpetuum Mobile uz podršku Ministarstva porodice, omladine i sporta Republike Srpske.



## OMLADINSKI CENTAR „JAJCE“

Ul. Kralja Tvrtka 5/1, 70 101 Jajce

Tel./fax: 030 654 027, 063 906 874

E-mail: [oc.jajce@gmail.com](mailto:oc.jajce@gmail.com), [oc.projekti@gmail.com](mailto:oc.projekti@gmail.com)

Web: [www.codjajce.com](http://www.codjajce.com)

### ✚ Grad Jajce na listi svjetske baštine UNESCO-a

Nakon kandidature grada Jajca na listu svjetske baštine UNESCO-a, Omladinski centar Jajce je prepoznao potrebu za educiranjem i usmjeravanjem mladih ljudi prema turizmu kao najperspektivnijoj grani privrede u Jajcu. Projekat Omladinskog turizma uskoro bilježi šest godina rada i iza sebe ima nekoliko uspješno realizovanih aktivnosti: izrada prve turističke web stranice, [www.jajcetourism.com](http://www.jajcetourism.com), uspostava info tačke, izrada baze podataka, izrada prvog turističkog vodiča i ukupno četiri treninga za turističke vodiče.

Treninzi za turističke vodiče s ciljem upošljavanja mladih ljudi je zasigurno jedna od tih aktivnosti na koje smo veoma ponosni. Rezultat toga je usporavanje raseljavanja mladih ljudi iz Općine zbog omogućavanja privremenog – sezonskog upošljavanja.

U okviru Udruženja omogućili smo stalni rad biroa – info tačke preko koje putem telefona i mail adrese odgovaramo na upite turistima i na taj način olakšavamo njihovu posjetu. O tome svjedoče brojni zadovoljni turisti koji preporučavaju Jajce kao odličnu i prelijepu turističku destinaciju.

Osim koordinatorice projekta, Aide Klapuh u uredu svojim radom i iskustvom promovisanju i unapređivanju turizma doprinosi i EVS volonterka iz Francuske Elodie Kenneybrew. Aktivno se radi i na redovnom ažuriranju nove web stranice [www.visitjajce.com](http://www.visitjajce.com) na kojoj se nalaze svi važni podatci za turiste od kulturno-historijskih spomenika koje mogu posjetiti, prirodnih ljepota, sportsko-rekreativnih aktivnosti do smještaja u Jajcu.

Za predstojeću, 2015. turističku sezonu jedan od važnijih ciljeva je bio izraditi dopunjeno izdanje turističkog vodiča kojeg smatramo veoma korisnim za svakog turistu koji se odluči ostati u Jajcu više dana. Vodič sadrži mapu grada, također izrađenu u okviru projekta, mapu regije, opise spomenika, prirodnih ljepota, te sve osnovne informacije potrebne za boravak u gradu.

Jajce – grad muzej pod otvorenim nebom je otvoren za sve ljubitelje historije i kulturno-historijskog naslijeđa, te avanturiste i zaljubljenike prirodnih ljepota. Ako ste Vi jedan od njih dobro došli ste u ovaj grad i naravno, kontaktirajte nas ☺



visit Jajce



**ERNADA AVDIBEGOVIĆ, član Omladinske mreže, pojedinac VIJEĆE MLADIH OPĆINE KLADANJ**  
E-mail: [erna\\_begovic20@yahoo.com](mailto:erna_begovic20@yahoo.com)

### ✚ Mnogobrojne aktivnosti u Kladnju tokom aprila

► Polovinom mjeseca aprila na sastanku radne grupe Kladanj - Vlasenica naša draga sugrađanka Sonja Prvulović dobila je priznanje kao NAJ ŽENA projekta Pro-Budućnost za svoj volonterizam u lokalnoj zajednici. Ovom prilikom mi iz NVO sektora joj čestitamo i želimo joj još mnogo uspjeha u radu.

► Dana 04.04. pod vodstvom prof. Đuldine Kurotvić je obilježen Svjetski dan napuštenih životinja. Polaznici *Civitas*a iz Srednje škole Kladanj su nahranili životinje i napravili panoe na kojima su predložili rješavanje problema pasa lualica.

► Dolaskom proljeća na naša vrata, u Kladnju se sportski duh kod mladih probudio tako da je 26.04. ujutro u osam sati Biciklistički klub Kladanj otvorio svoju ovogodišnju sezonu vožnjom na ruti Kladanj - izletišta Muška Voda. Biciklijadi je prisustvovao veliki broj građana svih uzrasta.

► Medžlis islamske zajednice Kladanj je bio organizator aprilskog malonogometnog turnira za polaznike mektebske nastave na području općine Kladanj. Najuspješniji mekteb je bio mekteb Hadim Ali-pašine džamije na općinskom takmičenju 13. 04. Oni su na kantonalnom turniru u Banovićima, održanom 27. 04. predstavljali općinu Kladanj i osvojili II mjesto.

► U periodu od 11. 04. do 14. 04 u prelijepom ambijentu hotela Garden u Konjicu održan je trening za sve organizacije koje se bave borbom protiv govora mržnje i netrpeljivosti. Članovi Kolacija za toleranciju, te rukovodioci „No Hate“ timova iz cijele BiH imali su priliku slušati nova saznanja iz oblasti menadžmenta organizacije kao i pripremu za zajedničku Kampanju za toleranciju 2015. Organizator ove obuke je bio OSCE BiH.

► Dana 26. 04. 2015. u Gazi Husrev-begovoj biblioteci u Sarajevu pod pokroviteljstvom Rijasetu islamske zajednice u BiH održani su III po redu susreti bošnjačkih nevladinih organizacija i aktivista/ica. Osim obraćanja prisutnima predstavnika IZ BiH, susreti su prošli u duhu razgovora kako očuvati porodicu i porodične vrijednosti u današnjem vremenu. Predstavnici Udruženja Humanost na djelu Birra, Kladanj su uzeli učešće na ovoj manifestaciji.





**UG Tolerancijom protiv različitosti - ToPeer**

**Vidovdanska 43, 74 000 Dobož**

**Tel.: + 387 53 205 370, +387 53 205 371**

**E-mail: [topeer@teol.net](mailto:topeer@teol.net), [nvotopeer@gmail.com](mailto:nvotopeer@gmail.com)**

**Web: <http://topeer.ba/>**

### **✚ AKTIVNOSTI UG ToPeer-a**

Događaji u prošloj, 2014. godini su trasirali aktivnosti UG ToPeer bez obzira na Strategiju, naše Programe rada, a u jednom dijelu smo mijenjali i aktivnosti projekata, naravno zahvaljujući razumijevanju donatora. Naše aktivnosti bismo mogli podijeliti na tri dijela:

1. Najvažnije - redovne gdje smo rješavali identifikovane potrebe građana, posebno razvijajući mjesne zajednice,
2. Jednako važne - aktivnosti na sanaciji posljedica poplava u dobojskom kraju i uključivanje ili čak organizovanje humanitarnih akcija posebno kad su djeca u pitanju,
3. Ne manje važne - na promociji, ali i aktivnostima koje ukazuju na povredu građanskih, ljudskih prava posebno žena i mladih.

U ovom mjesecu sumiramo naše aktivnosti i smatrali smo da je neophodno posebno istaći razvijanje Mreže za aktivne zajednice, zatim izvanrednu saradnju sa mrežom Account, a sve to ne bi bilo moguće da nismo uspjeli uspostaviti koordinaciju sa drugim organizacijama u Doboju - posebno sa organizacijama Merhamet i Centar za razvoj civilnog društva.

Naša organizacija je privela kraju pripreme i od marta mjeseca djeluje kao Centar za razvoj zajednica.



Zahvaljujući završenim izborima za članove Savjeta MZ u Gradu Doboju, a na osnovu iskazanih potreba novoizabranih članova usvojili smo Program edukacije za nove članove Savjeta, započeli smo radionice za izradu strateških planova razvoja zajednica. Do danas, u proteklih 2 mjeseca 6 MZ donosi svoje Strateške planove.

Pripremili smo, u saradnji sa Savjetima MZ više od 20 projektnih prijedloga odnosno ideja/potreba koje bi se mogle realizovati u ovoj godini. Zahvaljujući Programu PRO Budućnost 18 MZ, a 7 je uspješno apliciralo i dobilo projekte kojim su sanirali posljedice od poplava.

Jedna od aktivnosti koja je indirektno vezana za razvoj mjesnih zajednica jeste umrežavanje i edukacija zajednica etažnih vlasnika (nekadašnjih kućnih savjeta). U toku su pripreme formiranja Konzorcijima Zajednica etažnih vlasnika koji će u narednom periodu svojim djelovanjem zagovarati određene promjene i unapređenje kulture življenja u Gradu Doboju.

U ovom momentu 17 predstavnika ZEV, kao članovi Inicijativnog odbora prolaze edukaciju koja obuhvata javno zagovaranje, razvijanje projektnih prijedloga, primjenu metodologije razvoja uz učešće zajednica (EMI) kao i mobilizaciju volontera.



U protekla tri mjeseca održali smo četiri tematske konferencije, radnog naziva „Živjeti sa poplavama“ koje su direktno vezane za prava građana prije ali i poslije poplave. Konferencije su bili veoma posjećene, a ono što je njihova glavna karakteristika jeste mogućnost građana da u direktnom razgovoru sa odgovornim licima ali i stručnjacima razgovaraju, ukažu na probleme i traže rješenja da se nikad ne ponove događaji iz maja 2014. godine.

Dakle, bilo je riječi o prevenciji, ali i o posljedicama i odgovornostima u vezi sa dešavanjima prije, u toku i poslije poplave. Učešće na konferencijama su uzeli građani iz poplavljenih opština i prosječna posjećenost se uvijek bližila broju 100.

Zahvaljujući projektima i donatorima Norveškoj ambasadi, Fondaciji za osnaživanje žena, partnerskoj organizaciji iz Italije MIRNI MOST – *un ponte per la pace onlus*, u aprilu smo sanirali 5 zajednica etažnih vlasnika, tri porodice su dobile materijal za plastenike, izgradnju štala, sanirali smo 5 stanova, te podržali i pomogli 42 porodice paketima i poklonima čija se vrijednost kretala od 800 do 1.000 KM.



Naše redovne aktivnosti u okviru *Škole odrastanja* su u mjesecu aprilu bile tematski vezane za ekologiju, te su timovi za rad sa djecom, naravno i naši najmlađi korisnici bili vrlo aktivni u akcijama čišćenja, ali i kreativnom izražavanju u vidu crteža, pjesama ili čak i igrokaza.



Volonterske akcije, kampanje i informisanje građana su naše redovne aktivnosti i one se uvijek održavaju bez obzira na vremenske (ne)prilike.

April je bila prilika da građane podsjetimo na njihovu odgovornost čuvanja životne sredine, te na njihova prava i odgovornosti kao potrošača....





**LJUBICA MLADJENOVIĆ**, referent za mlade  
**GRADSKA UPRAVA BIJELJINA**  
 E-mail: [ljubica.mladjenovic@gmail.com](mailto:ljubica.mladjenovic@gmail.com)

## ✚ APRIL – MJESEC ČISTOĆE

Već četvrtu godinu za redom u okviru akcije „April mjesec čistoće“ udruženja građana i omladinske organizacije zajedno sa predstavnicima Gradske uprave u Bijeljini daju svoj doprinos u proljećnom sređivanju Grada Bijeljine.



Prekrečene su fasade na objektima u centru grada i nacrtani grafiti znamenitih ličnosti. Planirano je da se uradi ukupno pet grafita na oštećenim i išaranim fasadama grada u užem centru.

Osim grafita, ofarbani su i stubići i klupe u parkovima u centru grada. Svoj doprinos uređenju grada, osim volontera dali su i mlađi službenici Gradske uprave Grada Bijeljina.



## INFORMACIJE / DONATORI / POZIVI

### 1. Poziv za dostavu projekata - zajednička saradnja na aktivnostima

Javne i privatne institucije registrovane kao članice CEI (Centralne Evropske Inicijative), kao i internacionalne i regionalne organizacije pozvane su da apliciraju na CEI fond za saradnju. Fond je namijenjen inovativnim aktivnostima koje favorizuju mobilnost i umrežavanje.

Prijedlozi se trebaju fokusirati na izgradnji kapaciteta po principu transfera i dijeljenja znanja, naročito od strane EU CEI država članica na države koje nisu članice u EU CEI. Aktivnosti mogu biti konferencije, seminari, radionice i trening aktivnosti.

Prijedlozi se trebaju podudarati sa CEI Planom aktivnosti za 2014. - 2016. i treba da ispunjavaju kriterije koji su istaknuti u Pozivu za prijedloge.

**Rok za dostavu prijedloga:** 20. maj 2015., 17:00:00 CEST (GMT+2) Trieste time.

Potencijalni doprinos od strane CEI: 15.000 Eura

Obavezan period implementacije projekta: 1.1. 2016. do 31.12. 2016.

**Poziv za dostavu prijedloga:**

[http://www.cei.int/sites/default/files/attachments/docs/Cooperation%20Activities/cei\\_cooperation\\_fund\\_call\\_for\\_proposals\\_2015.pdf](http://www.cei.int/sites/default/files/attachments/docs/Cooperation%20Activities/cei_cooperation_fund_call_for_proposals_2015.pdf)

**Aplikaciona forma:**

[http://www.cei.int/sites/default/files/attachments/docs/Cooperation%20Activities/cf\\_call\\_2015\\_application\\_form\\_template.dotx](http://www.cei.int/sites/default/files/attachments/docs/Cooperation%20Activities/cf_call_2015_application_form_template.dotx)

**Pravila raspodjele sredstava za CEI finansiranje aktivnosti zajedničke saradnje:**

[http://www.cei.int/sites/default/files/attachments/docs/Cooperation%20Activities/rules\\_allocation\\_cooperation\\_activities\\_2014.pdf](http://www.cei.int/sites/default/files/attachments/docs/Cooperation%20Activities/rules_allocation_cooperation_activities_2014.pdf)

**Za više informacija:** [applications.coopfund@cei.int](mailto:applications.coopfund@cei.int)

### 2. NED - Grant za unapređenje i jačanje demokratskih

Nacionalna naklada za demokratiju (NED) poziva organizacije civilnog društva, udruženja, nezavisne medije, i ostale slične nevladine organizacije iz svijeta da apliciraju na finansiranje grantova predviđenih u 2015. godini. NED godišnje finansira stotine projekata organizacijama koje rade na unapređivanju demokratskih ciljeva i jačanju demokratskih institucija.

Fondacija obezbjeđuje više od 1000 grantova godišnje organizacijama koje se bave promocijom demokratije u preko 90 država. Iznos granta razlikuje se u zavisnosti od veličine i obima projekata, ali prosječan iznos u poslednjih 12 mjeseci je 50,000 Američkih dolara.

**Rok za apliciranje je 19. juni tekuće godine.**

**Punu aplikaciju možete pronaći na sljedećem linku:**

<http://www.ned.org/grantseekers>

Izvor: Balkan Civil Society Development Network, <http://www.balkancsd.net>

### 3. Grantovi Međunarodnog fonda za promociju kulture

**Rok za prijavu:** 29. maj 2015., do podne

**Otvoreno za:** projekte koji se tiču produkcije kulture i umjetničkih dijela i projekte koji doprinose uspostavljanju kulture i razvoju strategija i programa.

**Grant:** između 20,000 i 100,000 dolara (do 80% vrijednosti projekta)

- Produkcija kulturnih i umjetničkih dijela
- Organizacija kulturnih i umjetničkih događaja na nacionalnom, regionalnom i međunarodnom nivou, doprinoseći uspostavljanju kulture i razvoju strategija i programa

#### Podobnost

Za sufinansiranje mogu aplicirati:

- Pojedinci, umjetnici i stvaraoci
- Javna tijela sa posebnom odgovornošću za promociju kulture i umjetničkog stvaralaštva
- Nevladine organizacije i neprofitna udruženja čiji ciljevi su u saglasnosti sa ciljevima fonda i doprinose promociji kulture i umjetničkog stvaralaštva

IFPC pomoć se dodjeljivati aplikantima u skladu sa dostupnošću sredstava i usklađenosti projekta sa sljedećim kriterijima:

- Iznosi mogu biti između 20,000 i 100,000 dolara i ne može biti veći od 80% ukupne vrijednosti projekta
- Drugi iznos finansiranja je prikazan, a koji pokriva 20% troškova projekta
- Traženi iznos je odgovarajući za implementaciju projekta
- Predložene aktivnosti imaju odgovarajući plan monitoringa
- Projekat može imati institucionalne i socio - ekonomske rezultate
- Projekat ima kalendar implementacije aktivnosti, projekat traje do 12 mjeseci

**Grant:** Traženi iznos bi trebao da bude između 20,000 i 100,000 dolara, i ne bi trebao da prelazi 80% ukupnog iznosa projekta.

#### Aplikacija

- Trebate napraviti račun kako bi ste započeli svoju online aplikaciju;
- Aplikacija se popunjava online
- Tokom popunjavanja aplikacije svoj rad možete sačuvati prije nego podnesete projektni prijedlog
- Sve aplikacije trebaju biti na Engleskom ili Francuskom jeziku
- Svaka organizacija može predložiti jedan projekat
- Kada podnesete projektni prijedlog naknadne promjene neće biti moguće
- Finalna selekcija će se desiti u Februaru 2016. Uspješni kandidati će biti obaviješteni dvije sedmice nakon toga.

Rok za podnošenje prijava je 29. maj 2015. u podne CEST - Paris, France vrijeme. Zbog velikog broja aplikacija tokom posljednjih sati roka za podnošenje prijedloga moguće je da će stranica biti zagušena. S toga se preporučuje da svoju aplikaciju podnesete prije tog roka. Nekompletne aplikacije se neće uzeti u razmatranje.

Ukoliko imate bilo kakvih pitanja molim vas kontaktirajte [infoifpc@unesco.org](mailto:infoifpc@unesco.org).

Više na: <http://www.mreza-mira.net/16952-grants-by-the-international-fund-for-promotion-of-culture/#sthash.txlrOtVkdpuF>

## 4. Poziv za podršku građanskim projektima i inicijativama – FOND VOLIM TUZLU

**PROGRAM PODRŠKE RAZVOJU ZAJEDNICE** podstiče građanski aktivizam i podržava ideje i inicijative koje će doprinijeti poboljšanju uslova življenja, podstaći na volonterizam i animirati građane da se uključe u razvoj zajednice i civilnog sektora. U okviru ovog programa **FOND VOLIM TUZLU** usmjeren je na podršku inicijativama građana, udruženja i institucija sa područja Grada Tuzla.

**Poziv za prijem aplikacija u I aplikacionom krugu otvoren je do 10. maja 2015. godine.**

### CILJEVI PROGRAMA

- Unapređenje uslova življenja na području Grada Tuzla
- Veće učešće građana u razvoju zajednice
- Jačanje civilnog sektora na području Grada Tuzla

### KO MOŽE APLICIRATI?

- nezavisne organizacije i udruženja sa područja Grada Tuzla
- nezavisne samoupravne institucije sa područja Grada Tuzla (biblioteke, obdaništa, umjetničke škole...)
- neformalne grupe građana sa područja Grada Tuzla

### ŠTA PODRŽAVAMO?

- Inovativne projekte iz različitih područja društvenog života koji odgovaraju na potrebe lokalne zajednice i kojim se direktno unapređuju uslovi življenja u Tuzli.
- Podržavamo projekte koji traju od 1 mjesec do 1 godinu
- Projekti promovišu građanski aktivizam i volonterizam i zasnovani su na volonterskom angažmanu aplikanata
- Projekti su usmjereni prema poboljšanju uslova življenja u zajednici, tj. na konkretno rješavanje određenog problema ili zadovoljene određene potrebe u zajednici
- Donacije se izdaju u vrijednosti od 100-2000 KM (više u kriterijima)

### ROK ZA PRIJAVU

- Poziv za prijem aplikacija u I aplikacionom krugu otvoren je do 10. maja 2015. godine.

### KAKO APLICIRATI?

Prilikom apliciranja potrebno je dostaviti projektni prijedlog u standardnoj aplikacionoj formi FTZ-a. koju možete preuzeti na dnu teksta. U koliko vam je potrebna podrška pri ispunjavanju aplikacije možete se obratiti direktno u kancelariju Fondacije tuzlanske zajednice ili na broj telefona 362-832. Potpisanu i ovjerenu dokumentaciju treba dostaviti poštom ili lično u kancelariju Fondacije tuzlanske zajednice, na adresu: Pozorišna 13, 75000-Tuzla, i u elektronskoj formi na:

**e-mail: [fondtz@fondacijatz.org](mailto:fondtz@fondacijatz.org) do 10.05.2015.**

**OBAVEZNO** pročitajte detaljnije informacije, aplikaciju, upute i kriterije u prilogima ispod:

**Link: <http://fondacijatz.org/index.php/novosti/369-poziv-za-podrsku-gradanskim-projektima-i-inicijativama-fond-volim-tuzlu>**

**Više na: <http://www.mreza-mira.net/16893-poziv-za-podrsku-gradanskim-projektima-i-inicijativama-fond-volim-tuzlu/#sthash.uO471BjC.dpuf>**

## 5. Međunarodni omladinski radni kamp – Franco Bettoli “Srebrenica – Put ka novoj Evropi 2015”

**Lokacija: Potočari (Srebrenica), Bosna i Hercegovina**

**Period: Od 10. jula do 26. jula. 2015. godine**

Aktivnosti: Lista aktivnosti koje će se implementirati za vrijeme kampa se formira u saradnji sa opštinom Srebrenica i u skladu sa projektima MFS-Emmausa.

**Neke od aktivnosti planiran za ovu godinu su:**

- Radne aktivnosti izgradnje i rekonstrukcije;
- Distribucija humanitarne pomoći i namještaja;
- Uređenje školskog dvorišta;
- Izleti u glavni grad Sarajevo, Doboj Istok i Tuzlu, potom izlet na jezero Perućac;
- Sportske aktivnosti i turniri;
- Srebrenica Wave Festival – kulturno zabavni program i koncert.

Ove godine Međunarodni forum solidarnosti – EMMAUS organizuje sada već tradicionalni 10-i kamp za mlade. Ovogodišnji kamp je po mnogo čemu drugačiji od predhodnih. Uz uobičajene aktivnosti koje učesnici realiziraju u saradnji sa opštinom Srebrenica i u skladu sa projektima MFS-EMMAUS-a, a planiran je i festivalski dio – Srebrenica Wave Festival. Festival nudi pregršt aktivnosti koje će skupa sprovoditi učesnici kampa i lokalno stanovništvo opštine Srebrenica. Planirane su edukativne i zabavne radionice, razne sportske aktivnosti, izleti i naravno druženja sa mladima iz cijeloga svijeta. Cilj nam je približiti kamp lokalnom stanovništvu i skupa sa njima napraviti pozitivnu promjenu u Srebrenici. Na kampu u Srebrenici svake godine učešće uzima preko 100 ljudi iz cijelog svijeta.

Godina 2015-ta je od velike važnosti jer se obilježava 20 godina od genocida. Učesnici će imati priliku aktivno učestvovati u obilježavanju godišnjice genocida, komemoraciji i dženazi žrtava u Memorijalnom centru « Potočari » koja se organizuje svake godine 11. jula.

### Registracija/ aplikacija

**Rok za prijem aplikacija je 20. juni 2015. godine.** O ishodu aplikacije biti ćete obavješteni do 25. juna 2015. godine. putem e-maila ili broja telefona koji ste naveli u aplikaciji. Odabrani kandidati nakon toga biti će detaljnije upoznati sa aktivnostima „Međunarodnog omladinskog radnog kampa – Franco Bettoli „Srebrenica, put ka novoj Evropi“. Broj mjesta je ograničen, zato **PRIJAVITE SE.**

Za sve dodatne informacije, nejasnoće ili pitanja budite slobodni pisati nam na:

[mladi@mfs-emmaus.ba](mailto:mladi@mfs-emmaus.ba)

Prijaviti se možete ovdje.

**Izvor: <http://mladi.info/index.php?type=1&a=skup&id=7160>**

## 6. EU poziv za dostavljanje prijedloga projekata

Delegacija Evropske unije u Bosni i Hercegovini objavljuje poziv za podnošenje prijedloga projekata za aktivnosti vezane za “Instrument podrške civilnom društvu, program 2014/2015” finansiranih iz Programa predpristupne pomoći za 2014./2015. godinu.

**Opšti cilj** ovog poziva je: Dinamičnije civilno društvo koje aktivno učestvuje u javnim raspravama o demokratiji, ljudskim pravima, društvenoj uključenosti i vladavini prava sa sposobnošću da utiču na politike i donosiocje odluka.

### Specifični ciljevi ovog poziva su (za lot 1-Edukacija)

Podržati umrežavanje u:

1. Ojačati veze između obrazovnog, radnog (ili radničkog) i ekonomskog sektora, poboljšati mogućnost zapošljavanja radne snage pomoću obrazovanja i obuke odraslih u skladu sa tržištem rada
2. Podržati razvoj edukacije za odrasle i trenerskog sistema u Bosni i Hercegovini u kontekstu cjeloživotnog učenja
3. Jačanje ljudskih kapaciteta u sektorima obrazovanja, rada, zapošljavanja i zaposlenika u: strateškom planiranju, razvijanju standarda obrazovanja odraslih, treninga, certificiranju odraslih, monitoringu i evaluaciji obrazovanja odraslih u BiH, i prepoznavanju adekvatnih potreba treninga

### Specifični cilj ovog poziva (za lot 2 – Okoliš):

Za podršku umrežavanja koje doprinosi direktnoj implementaciji EU ekoloških standarda, posebno u područjima klimatskih promjena, vode, vazduha, tlo, buka, hemikalije, okoliš i zdravlje, otpad i prirodni resursi, šume, zaštita prirode i inovacije.

### Specifični cilj ovog poziva (za lot 3- Preduzetništvo)

Za podršku umrežavanja u smanjenju nezaposlenosti kroz poboljšanje saradnje među ključnim stejkholderima na lokalnom nivou i implementaciji mjera aktivne politike poboljšanja. Borba protiv nezaposlenosti kroz podršku ruralnom razvoju i povećavanju konkurentnosti domaće ekonomije.

### Specifični cilj ovog poziva (za lot 4- Novinarstvo i ljudska prava)

Za podršku umrežavanja organizacija civilnog društva, rješavanju problema u području novinarstva i ljudskih prava koje se odnose na pravo na slobodan pristup informacijama, slobodu izražavanja, zaštite od nasilja i pritisak.

### Specifični cilj ovog poziva (za lot 5- Anti-korupcija)

Podrška organizacijama civilnog društva i udruženjima biznismena u rješavanju korupcije i implementiranju anti-koruptivnih mjera jasno povezanih sa antikoruptivnim strategijama i akcionim planovima javnog sektora.

**Iznos granta:**

**Lot:1-4**

- Minimalan iznos 150,000 EUR
- Maksimalan iznos: 250,000 EUR

**Lot 5:**

- Minimalan iznos: 120,000 EUR
- Maksimalan iznos: 300,000 EUR

**Prihvatljivi troškovi unutar granta:**

- Minimalan procenat: 50% ukupno dozvoljenih troškova za aktivnosti
- Maksimalan procenat: 90% ukupnih troškova za aktivnosti

Kompletna projektna dokumentacija se nalazi ovde: [delegacijaEUBiH\\_2015041508342](#)

**Rok za podnošenje** projekata je 02. juni/lipnja 2015. godine u 16:00 sati po lokalnom vremenu.

**Kompletna dokumentacija za prijavu projekata može se dobiti na sljedećoj adresi:**

Delegacija Evropske unije za Bosnu i Hercegovinu,  
Sektor Finansija, Sekcija Nabavki, Skenderija 3a, 71000 Sarajevo

ili na web stranicama:

<https://webgate.ec.europa.eu/europeaid/online-services/index.cfm?do=publi.welcome>

i

<http://www.europa.ba/Tenders.aspx?lang=EN&cat=2>

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

**Rok za dostavljanje informacija za svako naredno izdanje je 30.-ti u mjesecu.**

WEB Stranica Mreže:

sCh design

Webmaster:

Emir Delalić-Zeko -  
Tuzla

emir.delalic@gmail.com

web: [www.omladina-bih.net](http://www.omladina-bih.net)

mejling lista Mreže:

[posta@omladina-bih.net](mailto:posta@omladina-bih.net)

Adrese za slanje vaših informacija za mjesečni bilten:

hcatuzla@bih.net.ba; orctuzla@bih.net.ba

fax: 035 258 077

Omladinski resursni centar Tuzla

Hadži Bakirbega Tuzlića 1,  
75000 Tuzla

tel / fax: 035 258 077

e-mail: orctuzla@bih.net.ba

hcatuzla@bih.net.ba

**Mjesečni bilten uređuje Omladinski resursni centar - ORC Tuzla**